

# La carta del apóstol

## San Judas

---

### Judas escribe a los que Dios ha llamado

<sup>1</sup>Asa Júdasat, ba Jesús chiwa acu ayin carit uch cuihsuro. Asan Jesucristo cacumró. Santiago tanaró. Sirat Tetát ba bar cájacro. Ba racar reht cájacro. Baat ima chihtá wácati acu Jesucrístoat ba obir yajcaro. Etar aját ba acu ayin carit uch chihsuro. <sup>2</sup>Aját ba cuitar Sir ojcor conro. Ba cuécuti acu, ba óhbacan cuít ítayta acu, ba sehnacan cuít rehcayta acu conro.

### Los que enseñan mentiras

*(2 Pedro 2.1-17)*

<sup>3</sup>Rábinu, aját ba sehnacro. Récaji echí aját Jesucrístoat is sújac ojcor cuihsún séhŵajacro. Eyta cuihsún séhŵajac cuar aját ítitan, uch ojcor cuihswata binro. Cahujinat ba cayar yajti acu, baat Sir chihtá wácati acu cuihsún séhŵaro. Sir ima chihtá ey tehmoti acu récaji Sir ima uw quin caba wac bahjacro.

<sup>4</sup>Aját ráhcuitan, cahujinat ba cayar yajquín acu ba tac icar baat istiti itay yinjacro. Uw éyinatán Sir tamo síhŵatiro. Eyinat Sir chihtá tehmon acu wacaro: “Sirat is sehnac etar isan wiŵ istiy jor, wiŵ istiy jor ohbac camátaro,” wacaro. Jesucristo ojcor cat wacaro: “Eyan Siri batro,” wacaro. Eyinat eyta waquíc cuar, Jesucrístoan is acu Sitro. Is acu Cáraro. Uw eyta bin ojcor récajian bar cuihsú bahjáquinro. Sirat uw éyinat tayar yajquíc ques icar tíŵata cuihsú bahjáquinro.

<sup>5</sup>Aját ba quin uch wacaro. Baat sínjaquey tan chinti ac wacaro. Uchicrian Sirat ima uwa Egipto cajc cut bin sújacro. Siwi yahncutan ima tamo síhŵati éyinra Sirat tíŵ jacro. <sup>6</sup>Eyta cat cuacúr Sir cacmín cahujinat cat Sir tayar yajacro. Eyinan Sir ima jor ítquin acsar Sir jor ítiti wácajacro. Eyta wacar cuacúr abá cuitar bin waa béjecro. Eyta waacayat ques cacmín eyin Sirat questajacro. Chistár cuácajar bi cuitar questár checúm baquí chira cuitar téjecro. Cabar tinic oceso tas erar questár téjecro. Uwat Sir tayar yajác ques tíŵ ic cab cuc oceso tas questajacro. <sup>7</sup>Sodóminat Gomórrinat tayar yajác tamo cat síhŵawi. Serin eyin imár serin owár isár yajquíc sínjacro. Wiŵ inat cat isár

yajquíc sínjacro. Isár eyta yajcayat ques Sirat Sodomín Gomorrín oca cuitar wahnjacro. Eyta wahnayat bahnáquinat ítitan, éyinat ur ay bár tayar yajác ques Sirat oca cut wahnjacro. Sirat Sodomín Gomorrín wahnár eyta ima tayar yájqueyín cat cab oc icar eyta wahnátaro. Oca tínajar bin icar wahnátaro.

<sup>8</sup>Eyta cuácayat yají jawí. Ah ricar serín eyín cam ajquitro. Eyinat ay síhwata eyra síhwatiro. Eta jawí imár ojç ruhwuro. Imár sibár ruhwuro. Síhwati cuat bitara útara ay bár yajcaro. Sir ima ajcá bár chácáro. Sir ima cacmín ojçor cat ahsín tewro. <sup>9</sup>Eyinat úchtaan wan yajcata bin yájtiro. Sir cacúm cara Miguelat yajquír eyta yájtiro. Miguelat Sísram owár Moisés chein sara técuajacro. Eyta técuajac cuar Sísram quin ajc ahsinra téwítiro. Miguel caran cuít cuar ahsinra téwítiro. Cuatán Sísram quin wajacro: “Síratra bah técuawi,” wajacro. <sup>10</sup>Serín éyinat imárati istiti bi ojçor ahsín tewro. Cuatán bitara útara ur ay bár yajca racar eyra bachuti yajcaro. Eyta yajquír ur ay bár icar ayro.

<sup>11</sup>Eyín Sirat ruhwáyqueyra. Uchicri sera Cainat yajác eyta, éyinat cat eyta yajcáy yinjacro. Ser ajca Balaamat Sir tayar yajác eyta, éyinat cat im eyta yajcáy yinjacro. Ray racar rehquít eyta yajcáy yinjacro. Sera Coreat Moisés chihotá cati ruhwyat ques tiwír eyta, eyín cat im eyta tíwayqueyra. <sup>12</sup>Ba rahra rahra sehnác rehquít owár yayín sécuayat, eyín cat ba owár yayín sécuaro. Eyín ba owár secuar cahujín tamo síhwati cuar cuít yácaro. Obas cayibat ima obas obir yajti rehçayat icúr acuí batro. Eyinan obas cayíb ay bár binan wanro. Bowarám riwa ayti binan wanro. Caruc ub chati binan wanro. Bowarám séroat cacac becayat riwa ayti rehçayat icúr acuí batro. Caruc ub chati rehçayat icúr acuí batro. Caruc ey injác etar ub cat, sihyá cat batro. Eyta cat uw eyín icúr acuí batro. Eyinat “Sir chihotá síwíc,” waquíc cuar Sir chihotá cat síwítiro. <sup>13</sup>Eyinan yacúr sobasob soboc binan wanro. Yacúr sobasob soboc eyat umít cuitar orjir cat, rurúm cat chac bahçaro. Yacúr sobasob sobocat orjir cat, rurúm cat chac bahr eyta uw éyinat cat Sir tayar yajc bahçaro. Eyinan cuacúr abá cuitar sásorinat ibit iwir éytaro. Eyinan Sirat baquí tinjac cuitar téyqueyra. Eyta téçayat erar bin uwan cuánaan waa báreyra.

<sup>14</sup>Is cohtín Enocat ah ríçara uw eyín ojçor wac bahjáquinro. Uchicri jaquit wac bahjáquinro. Enoc ey Adanat útarín báçtarín acsar acsar icar cucwoy cohná bíçajareht, Enoc yehnjáquinro. Enoc eyat wajacro: “Aját wacaro. Siran ima cacmín ay bin owár racáyqueyra. Ricán síhwáanar bin owár racáyqueyra. <sup>15</sup>Uw bahnaquin urá wahitín ac wicáyqueyra. Eyta wahitír Sir tamo síhwati bin cuécwayqueyra. Sir tayar yajác ques icar cuécwayqueyra. Sir ojçor ahsín tewíjac ques icar cuécwayqueyra,” wajacro. Enocat eyta wac bahjacro, Sir ojçor ahsín tewíquin ójçoran. <sup>16</sup>Serín eyín ríoquib binro. Eyín áçaman bitara útara ay bár rehçayat, éyinat waquít: “cahujín ajc tayar rehquíc,” wacaro. Cuatán éyinat bitara útara yajc cúntara, eyta bachuti yajcaro. Eyta yajca rabar imár ojçor ay tewro. Eyinat cahujín ojçor ay tewyat, tan chiwín acu tewro. Imár cuitar yajcayta acu eyta tewro.

### Amonestaciones a los creyentes

<sup>17</sup>Eyta cuácayat, Cara Jesucristo chihtá ehcúquinat ba quin wac bahjacan tan chinti jaw̃ i. <sup>18</sup>Jesucristo chihtá ehcúquinat uchta wac bahjacro: “Cabar tinic cuitar cab cuc racayat, uwat ba buror sisáyqueyra. Uw éyinat Sir tamo síhw̃ati cuar ima chihtá cuitar yajcáyqueyra,” wajacro. Jesús chihtá ehcúquinat uw eyin ojcor eyta wajacro. <sup>19</sup>Uwa éyinat ba rahra rahra técuayta acu cayar yajquín yajcaro. Imár urá cuitar icúr yajc cúntara eyta bachuti yajcaro. Eyin ur ícara Sir ima Ajcan Cámuran Eya witi binro.

<sup>20</sup>Cuatán bara ur eyta rehti jaw̃ i. Bara Sir tamo síhw̃an acu rahra rahra cuitar yajw̃ i. Sir Ajcan Cámuran Eya chihtá cuitar Sir ojcor conwi. <sup>21</sup>Sirat ba sehnác chihtá acsar etiti síhw̃awi. Eyat ba sehnác rehquít ima jor cuacúr itay beyáyqueyra. Ba yehw̃ bec acor ita rabar, beyata chihtá acsar etiti síhw̃awi. <sup>22</sup>Chiwa cahujinat Sir chihtá rahcuíc cuar áhajira ayra ráhctiro. Eyinat Sir chihtá wácati acu técuati siw̃ i. <sup>23</sup>Uwat ima oya oca sara tijcajaan oc cut wahnti ac, oca sar bin yehw̃ ír eyta, baat cat uw cahujín quin Sir chihtá waca ayti jaw̃ i. Cab oc icar wahnti acu eyta waca ayti jaw̃ i. Cuatán urá tehmó cun bár eyin racar cue reh̃w̃ i. Cue rehca rabar yají jaw̃ i. ¿Ba urá cat eyta rúhw̃ajaqui? ¿Baat cat éyinat yajquír eyta yájcajaqui?

### Alabanza final

<sup>24-25</sup>Uw bahnáquinu, “Siran ayan tahnacro,” waw̃ i. Sir im istir binat ba bucoy ima tayar yajc ayti síwataro. Baan ima ubot tayar bár chácataro. Baan ohbac ahní chácataro. Jesucristo is cáraro. Jesucrístoat isat tayar yajác túnjacro. Eyta etar Sirat is síwataro. Etar Siran caran cuitro. Ajcan urán cuitro. Bow̃an tahnacro. Réccaram cat eyta chájacro. Ah cat éytaro. Yahncút cat acsar acsar bur cut suw cut im eyta rehcaýqueyra. Amén